

XXII. IGANDEA URTEAN ZEHAR (A)

Otoitza

Zeru-lurren Jaungoikoa, Zugandik dator on guztia;
sartu gure bihotzetan zure izenaren maitasuna;
lotu gaitzazu gero eta estuago Zeurekin,
gure baitan biziarekin dezazun ona den guztia
eta biziarekin duzuna arreta handiz zaindu.
Zure Seme Jesu Kristo.

I. IRAKURGAIA: Jr 20, 7-9

*Jaunaren izena lotsakizun eta iseka zen
niretzat egun guztian.*

Jeremias Profetaren liburutik

Liluratu ninduzun, Jauna,
eta nik, liluratzeko utzi;
ni baino indartsuago zara,
eta menperatu ninduzun.
Barregarri nintzen egun guztian;
burlaka ari zitzaizkidan denak.
Hitzegin behar nien bakoitzean,
oihu hau egin behar: «Zigorra!»
deiar hau: «Hondamendia!»
Eta Jaunaren hitza lotsakizun eta iseka zen
niretzat egun guztian.
Eta esan nuen nire baitarako:
«Gogoratu ere ez dut egingo;
ez dut gehiago Haren izenean hitzegingo».
Baina Haren hitza su kiskalgarria zen nire bihotzean,
nire hezurretaraino sartua;
menpean eduki nahi nuen, eta ezin.

ERANTZUN SALMOA: Sal 62, 2. 3-4. 5-6. 8-9

R/. Zure egarriz daukat gogoa,
Jauna, ene Jainkoa.

Jainko, nire Jainko zaitut,
goizetik bilatzen zaitut,
zur egarriz daukat gogoa, zure irrikaz haragia,
lur idor, egarri, urgabe iduria. R/.

Egona nauzu Zuri begira jauretzean,
zure ospea eta indarra ikusi nahian.
Bizia baino hobea baita zure maitasuna,
ezpainok egingo dute zure goralpena. R/.

Goretsiko zaitut bizi naizen artean,
 jasoko ditut eskuok zure izenean.
 Gurinez eta mamiz bezala beteko zait gogoa,
 ezpain-ikaraz goretsiko zaitu nire ahoak. R/.

Zu gertatu baitzara nire laguntzailea,
 pozez oihu dagit zure hegal-itzalean.
 Nire gogoa Zuri itsatsia dago,
 zure eskuinak eutsita nago. R/.

II. IRAKURGAIA: Erm 12, 1-2

*Eskain itzazue zeuen buruak,
 opari bizi bezala.*

San Paulo Apostoluak Erromatarrei

Senideok: Jaungoikoaren errukiagatik eskatzen dizuet, eskain ditzazuela zeuen buruak, opari bizi, santu eta atsegingarri Jainkoarentzat; hori da zuen egiazko gurtzea. Ez zaitezte mundu honen antzeko egin, baizik eta antz-berritu zaitezte zeuen iritzietan, Jaungoikoaren nahia ezagutu dezazuen: on eta bikain dena, eta atsegingarri zaiona.

EBANJELIOA: Mt 16, 21-27

Aleluia: Ik. Ef 1, 17-18

R/. Aleluia.

V/. Jesu Kristo gure Jaunaren Aitak
 argi bitza gure bihotzeko begiak,
 horrela jakin dezagun
 nolakoa den Haren deiaren itxaropena. R/.

*Nirekin etorri nahi duenak,
 uko egin biezaio bere buruari.*

Jesu Kristoren Ebanjelioa San Mateoren liburutik

Aldi hartan, Jesus bere ikasleei adierazten hasi zitzairen, beharrezkoa zela, Bera Jerusalem joatea, han neke handiak jasatea zahar, apaiz nagusi eta idazlariengandik, hila izatea eta hirugarren egunean biztea. Orduan Pedrok, Jauna bereiz harturik, honela esan zion haserre antzean: «Jainkoarengatik, hori ez, Jauna! Ez zaizu gertatuko horrelakorik!»

Jesusek, Pedrori begira, esan zion: «Ken zaitez nire aurretik, Satanas! Erorbide zara Niretzat; zure gogoetak ez baitira Jaungoikoarenak, gizonarenak baizik».

Orduan Jesusek honela esan zien bere ikasleei: «Nirekin etorri nahi duenak, uko egin biezaio bere buruari, har beza bere gurutzea eta jarrai biezat. Izan ere, bere bizia salbatu nahi duenak, galdu egingo du; eta bere bizia Niregatik galtzen duenak, beretzat gordeko du.

Zertarako du gizonak mundu guztia irabaztea, bere bizia hondatzen badu? Edota zer eman dezake gizonak, bere bizia berriro eskuratzeko? Etorriko baita Gizonaren Semea Aitaren aintzatan, bere aingeruekin; eta orduan bakoitzari bere egiteen neurriko ordaina emango dio».

Oparigaien gainekoa

Eskaintza santu honek, Jauna,
ekar diezagula beti zure salbamenaren dohaina,
sakramentuetan ospatzen duguna
zure indarrak bete dezan.
Jesu Kristo.

Jaunartze ondorengoa

Mahai santuko ogia harturik, Jauna, otoitz egiten dizugu:
maitasunaren janari honek bizkor ditzala gure bihotzak
eta eraman gaitzala Zu gure senideetan zerbitzatzera.
Jesu Kristo.